

**VIRO AMPLISSIMO  
FRIDERICO E  
MARCHIONIBUS  
MANFREDINI  
PATAVINORUM...**

---



vol. 53

VIRO AMPLISSIMO  
**FRIDERICO**  
**E MARCHIONIBUS MANFREDINI**  
PATAVINORUM EPISCOPO RENUNTIATO  
QUO DIE  
**CATHEDRALEM BASILICAM**  
SOLEMNITER INGREDITUR

*Quo die Patavinorum Episcopus renuntiatus Cathedralē Basilicam ingenti omnium plausu solemniter ingredereris, officii mei esse duxi publicam Tibi obsequii ac observantiae significationem exhibere, magna exsultantis animi laetitia ac gratulatione. Hoc siquidem a me postulare videbatur cum pastorale munus, quod me Tibi perinde ac membrum capiti arctissimo quodam quasi vinculo ac prope cognatione coniungit, tum certa spes fore, ut Civitas ac Dioecesis universa haud parvum inde adjumentum capiat atque utilitatem: quae porro spes in dies clarior affulget, ac bonos omnes maxima voluntate perfundit. Hanc vero honoris significationem Tibi testatam volui quibusdam versibus rudibus plane ac inelegantibus, sed quae obsequentis animi sensa plenissime patefaciunt. Hoc*

tamen vehementer doleo, quod iidem neque amplissimae dignitati Tuae, neque hodiernae festivitatis decori ac magnificentiae ex aequo respondeant. Quod mihi est ita firmiter persuasum, ut eos nunquam edere ausus essem, nisi pro certo haberem, ad summorum Praesulum ovationes non solum poetarum cantus ac dulces sonitus cithararum, sed etiam raucisonos gestientium populorum clamores vel plurimum conferre. Quamobrem spero futurum, ut, quanquam nihil in me sit, ex quo aliquam possim commendationem quaerere, Tu tamen digneris signa benevolentiae ostendere amantissime suavitate illa Tua, qua animos recreas et solaris, atque meos versus, quicunque ii sint, quos in praesentiarum Tibi subjicio, optime Antistes, perhumaniter excipias, ac licet tanto haud dignos ornamento Tuis ornes auspiciis. Quod si cui in hac potissimum virium mearum infirmitate plus justo audere videar, is sciat non me de meipso, sed de Tua benignitate, ut par est, confidere, quae una in causa profecto fuit, cur illos in tantam hujus celebritatis lucem, quam ex se ferre non possent, fidenter emitterem.

PN. Z.

# FAMES JUSTITIAE <sup>(1)</sup>

## ELEGIDION

**O**, quem Justitiae bene suada Fames premit usque,  
Virtutis referas praemia digna tuae.

Haec Istrum Tiberimque velox pervasit, eamque  
Mox Caesar sensit, sensit et ipse Pius.

Hinc paribus studiis ad claram <sup>(2)</sup> Te atque vetustam  
Prodocimi sedem junctus uterque vocat.

Hoc dudum Deus, hoc oracula superna tulerunt <sup>(3)</sup>,  
Hoc sibi Justitiae vult saturanda Fames.

Laetantes caput attollunt Athesisque Padusque <sup>(4)</sup>,  
Quod domus ac patriae Tu decora alta novas.

Junetaque fluminibus gestit patrui umbra sepulchro,  
Cujus tellus adhuc, aequora et astra ferunt

Nomen <sup>(5)</sup>. Te resonant pingues circum undique campi,  
Teque omnis toto flumine ripa sonat.

Laetior at, magnisque fremens Te plausibus unda  
Medoaci repetit, concelebratque patrem.

Ito igitur, quo te Numen vocat. Omnia rident  
 Undique fausta Tibi. Fallor? an ipse Deus  
 Non Tibi grandia spondet? molles dulce virentum  
 Pratorum haud herbas tangere clam coluber  
 Audebit, subito aut vitreas accedere lapsu  
 Puri ad fontis aquas. Tutus in herbiferis  
 Jam pascet campis niveus grex: tutus ad amnes  
 Descendet riguos usque levare sitim:  
 Frondiferae jucundam tutus ad illicis umbram  
 Otia jam carpet mente animoque petens  
 Florentes colles, nemorumque amoena vireta  
 Fortunatorum, sidereasque domus,  
 Gaudia coelicolum centum, quo diva vocarit  
 Vox tua, vox dulcis sollicitique patris.  
 O mille aucta bonis tanto sub Praesule tellus,  
 Qui sibi cunctorum dotibus egregiis,  
 Ac raro sapiens moderamine corda revineat!  
 Felices populi! terra beata nimis,  
 Quam beat ore suo, roseo quam lumine vestit,  
 Ac replet solidis undique deliciis!



## ANNOTATIONES

---

(1) **E**pigraphæ jamdiu prostans in aula Episcopii maxima tanti Praesulis memoriam perennatura.

(2) Episcopalis Cathedra Patavina clarissima cum ob longam et non interruptam seriem Episcoporum incipientem a D. Prosdocimo, qui Patavinis Episcopus datus fuit ab ipso Apostolorum Principe D. Petro, tum ob illorum plures doctrina, prudentia, pastoralis sollicitudine ac sanctitate praestantes.

(3) Vulgo fertur, ante dictam epigraphem, atque alias hujusmodi, quae in eadem Episcopii aula plures leguntur ad perpetuam Patavinorum Antistitum recordationem, sanctum quempiam dictasse virum, afflante Numine.

(4) Flumina, quae inter in amoena planitie exsurgit Rhodigium, unde ortum suum duxit laudatus Antistes e patritia Manfredinorum Familia genere, doctrina, virtute ac religione praestantissima, nec non claris insignibus et egregia summorum munerum perfunctione.

(5) Fridericus Manfredini patruus Friderici hujus nostri amantissimus, cujus virtutes ac praeclara merita laudes omnes superant.







56